

CONCILIVM PROVIN. COLONIEN.

vnus panis & vnum corpus multi sumus, qui de vno pane & de vno calice participamus. Quamobrem ab huius conuiuij spirituali participatione longe absunt, qui inuidiæ vel odij veneno infecti, aut iracundiæ furore repleti fuerint. Monendi itaq; sunt qui communicare desiderant, vt de posita omni similitate, diligant alterutrum, vti vnus corporis membra, vt non sit schisma in corpore, sed in idipsum pro inuicem sollicita sint membra.

Quomodo singulis dominicis diebus plebs ad audiendā missam se præparabit. Cap. XXIII.

Docendus quoque populus, vt qui iuxta antiquum ecclesiæ ritum singulis dominicis diebus ad communicandum corpori & sanguini dominico non se præparat, missæ saltem parochiali, hisce, alijsq; festis diebus inter sit, vt tamen inter sacrificantem & assistentes non sit (more illo antiquo) tam frequens sacramentalis communitio, sit saltem sacræ doctrinæ, piæ exhortationis, precatationis, laudis, & gratiarum actionis communitio, vt sic quodammodo omnes spiritualiter communicent, cum desiderio etiam sacramentaliter communicandi. Ne vero populus ab hac missa parochiali & ab auditione verbi dei distrahat, placuerit nobis, vt si quæ sint aliæ missæ legendæ die dominico, hæ inchoentur primum post verbi prædicationem finitam, quemadmodum latius in Visitatione secundum diuersorum locorum mores ordinare studebimus.

e. & hoc attendendum de cōf. dist. 5. Ex cōc. Cartha. c. sacerdot. de cōf. dist. 1.

Docendus populus generatim, quid agatur in missa. Cap. XXV.

Docendus populus generatim, quid agatur in missa, & quibus partibus cōstet. Constat siquidem psalmodia, quem vocamus introitum, inuocatione & gloriosa celebratione sanctissimæ trinitatis, quæ in canticis Kyrieleyson, & Gloria in excelsis deo, peraguntur, precatatione seu Collecta, recitatione verborum propheticorum aut apostolicorum, quam vocamus Epistolam, sacris canticis, quæ vocamus Gradualia & Alleluia, & quæ sequuntur lectione euangelica, symboli recitatione seu professione fidei catholice cantico, quod non sine mysterio Offertorium appellatum est, Gratiarum actione, quæ dicta est Præfatio, religiosa commemoratione mortis, consecrationeque corporis & sanguinis dominici, quæ fit in Canone. Rursus, precatationibus, inter quas est precatio dominica, Sequitur osculum pacis, symbolum Christianæ charitatis, mox Communio. Rursus sacrum canticum, quod commune appellatur & precatio. Postremo loco, sacerdos totum populum velut in suam tutelam receptum, deo benedictione tradit, atque commendat, vt perseueret in affectu pietatis; mutuæque charitate, quorum quum admonetur populus, incipiet nedum credere, sed & sentire, quod in missa nihil non sit pium ac venerandum.